

Pāngarau

Tautuhinga Aromatawai Ā-Waho 2024

Te Paerewa Paetae

92068

Te Ingoa

Te whakamahi whakaaro āhuahanga, whakaaro ine hei whakaoti rapanga

Te Marautanga

Te Marautanga o Aotearoa

Te Wāhanga Ako

Pāngarau

Ngā Whiwhinga

E 5

Te Tukanga Aromatawai

He Kete Manarua

Te Wā Tuku Aromatawai

Te 1 o Oketopa 2024 ki te 30 o Oketopa 2024

Kete Manarua

Ko te KETE i pū mai i te pā harakeke, he whakapapa tōna.

He MANA tōna, e rua ōna āhuatanga; Kātahi: Ko ngā taonga tuku iho ka kohikohia e te ākonga. Ka rua: He whakapiki i te mana motuhake o te ākonga, ōna hapū, ōna iwi hoki.

He tāpaetanga ā-matihiko te āhua o te KETE MANARUA ka tukuna mai e te kura, ā, he kōpaki, he kiriata, he kōrero ā-waha, he rauata, he tuinga, he pūrongo, he whakaaturanga, he rātaka, he mahi rangahau aha atu aha atu.

Te Whakatakotoranga Aromatawai

Ka whakaritea e te ākonga tētahi Kete Manarua mō āna mahi kua kohikohia e ia, kua whakaraupapahia hoki, tae noa atu ki te rā aukati.

Mā Te Mana Tohu Mātauranga o Aotearoa (NZQA) ngā aromatawai e whakarite mō ia Kete Manarua hei taura mā te ākonga.

Ka whakamahi te ākonga i te whakaaro āhuahanga me te ine i ngā āhuatanga o ia rā, o ia rā, i ngā kaupapa me ngā horopaki huhua o te ao Māori hei whakautu rapanga.

Kia taunga te ākongā ki ngā tikanga e whai wāhi mai ana:

- ki te ture a Pythagoras
- ki ngā pānga pākoki o te tapatoru hāngai
- ki ngā taparau e ōrite ana te āhua
- ki ngā hononga koki o te rārangi pūtahi me te rārangi whakarara
- ki ngā hononga koki o ngā momo taparau
- ki ngā hononga koki o te porowhita
- ki te roa, ki te paenga, ki te horahanga, ki te horahanga mata, me te rōrahi
- ki ngā waeine ngahuru
- ki te kītanga, ki te papatipu, ki te paemahana me te wā
- ki ngā waeine pāpātanga, pērā i ērā mō te kiato, mō te tere, mō te utu ā-waeine me te whakapau kōhinu.

E whakaatu ana te Kete Manarua i ngā taunakitanga nei:

- i ngā tikanga koki o te porowhita
- i ngā āhua ōrite, i ngā whakamahinga whakaaro pānga riterite hei tātari i tētahi tapa
- i te ōwehenga pākoki me te ture a Pythagoras, i ngā pūāhua ahu-2, ahu-3 hoki
- i te paenga, i te horahanga me te horahanga mata, i te rōrahi, me ngā waeine ngahuru.

Anei ētahi tauira mō te Kete Manarua:

- he whakaaturanga me ētahi kōrero whakamārama (kia iti iho i ngā whārangi e 6)
- he kiriata (e 2-3 meneti)
- he kohinga whakaahua me ētahi kōrero whakamārama
- t/ētahi atu tūmahi aromatawai.

Ko Te Reo Matatini o te Pāngarau te huarahi matua e mārama ai te ākongā ki ngā ariā pāngarau, e whakawhitiwhiti kōrero ai, e eke panuku ai hoki ngā mahi a te ākongā.

Ngā Herenga Aromatawai

He mahi takitahi tēnei mahi nā te ākongā; me te whakatakoto taunakitanga mō te aromatawai ā-waho. He Kete Manarua ā-matihiko anake.

Kia tutuki pai te Kete Manarua ā-matihiko nei:

- me whakaputa hei PDF;
- me noho te rahinga tuari ki raro i te 5GB e pai ai te tārewatanga o ngā mahi ki te Online Digital Submission Portal;
- me tika te whakaraupapatanga o ngā mahi;
- me tika te whakatakotoranga o ngā mahi (kia kaua e noho tītaha, huripoki rānei);
- me tāmaua te kiriata ki te tītohunga ataata, ā, kua rāhuitia te tukuhanga noa i te honongaitua me tana kōtahi.

Te Motuhēhē o ngā mahi o ngā ākongā

Me pēhea e mōhiotia ai te motuhēhē o ngā mahi o ngā ākongā? He tukanga, he taunakitanga e mōhiotia ai nā te ākongā ake āna mahi aromatawai. Kia mataara ngā ākongā, ngā kaiako me te whānau o te kura hoki ki te motuhēhē o ngā mahi a ngā ākongā.

He māmā noa iho te tiki mahi a tangata kē, heoi, mā te mihi e whakaatu, e whakanui hoki i ngā tāngata me ngā puna awhina i puta ai ngā mahi a ngā ākongā.

Hei tauira:

- He rerenga kupu poto e tohu ana i te pūtakenga mai o tētahi kōrero;
- He rārangi tohutoro i te whārangi whakamutunga o ngā mahi;
- He mihi ki te tangata | puna awhina;
- Ngā momo puna awhina, puna kōrero rānei:
 - » Kōrero ā-waha: he uiui kaumātua, pakeke, rangatira, mātanga rānei;
 - » Ngā pukapuka i whakaputa;
 - » Ngā pukapuka kāore i whakaputa;
 - » Wāhitau ipurangi.

He kōrero anō i ngā wāhitau ipurangi o te paetukutuku NZQA:

- [Authenticity: NZQA](#)
- [Myth 3 Managing authenticity: NZQA](#)
- [Authenticity of externally assessed standards: NZQA](#)
- [Guidance on the acceptable use of Artificial Intelligence: NZQA](#)

Te Tāpaetanga me te Hāponotanga

Ko ngā tāpaenga Kete Manarua me mahi mā te pūnaha hou (kei te pae ipurangi matua o MyNZQA): [Tāpaetanga pūnaha hou NZQA](#).

Kāore te Kete Manarua matihiko e whakahokia ki te ākonga. Mēnā he kōrero anō mō te tāpaetanga me te hāponotanga o te mahi, mā te tari o NZQA e pānui atu ki ngā kura.

Mēnā kei te hiahia āwhina ki te tuku atu i ngā tāpaenga Kete Manarua:

- Īmēra mai ki assessment.servicecentre@nzqa.govt.nz,
- waea rānei i te NZQA Contact Centre mā te nama 0800 687 296.